

Aerwefpruch

Aerwehortsch

vumm

Geff. Got

Kerwespruch 1983

Ehr liewe Leit, es is so weit,
die Worfeller Kerb is heit.
Veele honn`s net glaawe wolle,
es gibt in Worfelle aa noch Dolle,
die sich wonn`s Zeit es dunn vesommele,
unn net uff de Gass `rumm gommele,
die onn alde Traditione knippe,
unn als Kerweborsch `rummhippe.

Mer soll`s net glaawe, s`es traurich awwer wohr,
die letzte Kerweborsch gab`s vor zwonzich Johr,
desdeweije honn mer uns zusommegeabbelt,
unn uns die Meiler fronzelich gebabbelt,
honn e paar Liedcher gesunge,
unn uns dezu dorchgerunge,
ebbes uff die Boah se`stelle,
onn de Kerb in Worfelle.

Aller Anfang der is schwer,
s`wär aa schlimm wonn`s net so wär,
des honn mer all erkenne müsse,
vunn weiße Kerweborsch dunn Mädcher küsse,
bis es erstmol soweit woar,
des hot gedauert fast e Johr,
doch jetzt honn mer`s endlich mol geschafft,
die Worfeller Kerbdie zwonzich Johre abgeschlafft,
is wirrer ufferstone vunn de Dohde,
drum speelt fer uns es Kerwelied noch Nohde!

Long honn mer iwwerlegt,
wos mer im Kerwespruch so segt,
om beste mer deht wos mache,
iwwer des die Leit aa lache,
des honn mer uns gedenkt,
unn honn uns unser Hern verenkt,
unn honn die Sache die bei uns bassiert
hier in unserm Kerwespruch notiert.

Oaner vunn de dollste Bolze hot gerisse,
oaner der`s eichtlich hät wisse misse,
der hot wahrschoinlich aa net dro gedenkt,
als man ihm e Freggel hot geschenkt,
daß mer des net in de Kofferroum vumm Audo sperrt,
weil des sunst bei dreißisch Grod verderrt,
die arm Sau, die Kloa, hät fast ins Gros gebisse,
die hott enn Hitzschloach kriggt unn hot geschloacht wern misse.
Drum speelt die Musik mit bedocht,
do werd die Sau geschloacht.

Mit e paar onnern Viecher aus dere Rass`,
hatte unser Fußballer ehrn Spass,
do soin doch medde im`e Fußballspeel,
fünf, sechs Wildsei, ich glaab es war`n so veel,
uff de Sportplatz druff maschieret,
unn honn sich donn gonz uhscheniert,
unser staawisch Speelfeld ogeguckt,
unn desdewije uffgemuckt:
"woas hobt`ern do fer` staawisch Feld,
hobt`er fer`n Rasen donn koa Geld?"

Kamerad schenk oi, e Gläsje Woi,
es muß emol getrunke soi!

Unsern Michael, ich glaab s`es net geloue,
macht um scharfe Hunde jetzt enn Boue,
mit em Schobott soim Hund wollt`er speele,
als ob dem Kerl es Hern deht fehle,
der Hund es doch scharf wie e Messer,
ich glaab jetzt waas`ers aach besser,
der Hund sterzt uff enn Diener hurradiegei,
unn es bei soim Oisatz mit Eifer debei,;
Er beißt em gonz kräftisch in de Arm enoi,
unn denkt "so muß enn rischtsche Wachhund soi!"

De Michael war gonz iwerrascht,
wie en do de Hund venascht,
do sterzt, wie wonn die Siren` deht brumme,
de Klaus ebei noch gonz benumme,
awwer wie der Flehbutz donn berappt,
daß er enn Kerweborsch geschnappt,
hott`er sofort Schluß gemoacht mit soine Bosse,
unn hott vunn unserm Michael donn obgelosse,
weil`em Alkohol im Blut net schmeckt,
unn er sunst vieleicht verreckt.

Unn die Musik speelt uns jetzt gonz forsch,
es Lied vunn de lustsche Kerweborsch.

Genuch vunn de Wutze unn em Hund,
jetzt nämlich geht`s erst rischtisch rund,
ehr liewe Leit,
jetzt werd`s nämlich Zeit,
daß mer mol ebbes onnerschts uff die Schipp dunn nemme,
damit uns net die Leit fortrenne,
honn mer noch e paar Sache nodiert,
die de Worfeller soin bassiert.

Aach die Oangler soin debei,
bei unsrer Leitverarscherei,
vunn dene war oaner groad beim Fische fonge,
als ess zu reijene hot oagefonge,
der hot donn schnell soi Zeig geschnappt,
unn es so dabbisch uff en Stoa gedappt,
doah hot`s en vunn de Boah geresse,
unn er es rickwärts in de Roi geschmesse,
mit nasse Klamotte hoamfahrn musst`er,
de Sohn vumm Unnerderfer Schuster.

Als de Kall-Hoinz aus`em Bachgrund hot geheiert,
do honn`se gonz gewaldisch oan gefeiert,
gesoffe honn`se wie die Lecher,
net aus Gläser, net aus Becher,
goanze Fesser honn`se leer geschluckt,
unn honn in de Keller noi geguckt,
daß ehne de Sprit net ausgeht unnerwegs,
bei ehern gesinge, gejhle unn geplägs,
aach es Köthe ehern Alfred war debei,
bei dere Gratissauferei,
der hot geschluckt wos gibst`e wos host`e,
damit`er kumme es uff soi Koste.
Der hot sich so soin Berzel zu gehaache,
do hot fast die Lewwer oafonge se`raache.

Als er donn genuch Prozente hat getonkt,
is`er gonz dorzelich devohgewonkt,
waas de Deiwel, geije halwer drei,
schnappt`en donn die Bolizei,
unn schmeißt`en donn in so e Zell,
wo mer om Berzel kriegt koah Dell,
wonn so en Kerl aus`em Gerer Lond,
rennt mit soim Kerwes on die Wond,
om nächste moijend läßt`en die Bolizei,
uff Ehre unn Gewisse wirrer frei,
sogar e Taxi hann`se ehm bestellt,
des wollt fer`s fahrn awwer aach noch Geld,
zwozich Mark hatt`er zu berappe,
der Ehlegässer Dabbes.

Weil der Alfred so verarscht es worn,
damit er kriegt uff uns koan Zorn,
speele uns jetzt die Speelmonnsleit,
es Lied vunn unsrer Adelheid.

Aach es Oinehmers ehern Schorsch,
is im Spruch der Kerweborsch,
dem es jo aa ebbes dolles bassiert,
do hot sich en Zugezoochene gonz schee blamiert,

der hot gedenkt er kennt mi`m Schorsch wos mache,
soi Bereeschnung wär zu laut, daß ich net lache,
schickt der dem doch Noachts um drei,
die Gerer Bolizei vorbei,
ich glaab der Kerl war net meh gonz frisch,
fühlt sich belästischt vumm Reijner soim gezisch,
es wär so laut, es hätt` beim Schloafe ihn gestehrt,
der hot wohl in de Schul net rischtisch zu gehert
des es doch notwenisch des Gebrumm,
denm ohne Wasser gehn die Kartoffel um,
drum ehr Zugezoochene seijt`s mol oi,
losst die Londwertschaft doch soi,
dodriwwer wisst`er jo doch net rischtisch Bescheid,
ansunsten seid ihr doch gonz kloare Leid!

Unn zu guter letzt,
werd aa noch unsern Wert vepetzt,
De Monfred nämlich konnt soin Schiurlaab vergesse,
den hot`s jo bei de Oakunft schunn geschmesse,
net`mol uff die Schi do is`er kumme,
mit soine große Laatsche dehne krumme,
schunn als er wollt die Koffer troue,
is er uff die Gusch gefloue,
wär em des net glei om Oafong schunn bassiert,
hät er sich onnerweidisch vieleicht lädiert,
do wär`er gewiss em Bersch enunnergebraust,
unn hätt debei e Schihitt umgesaust. -
awwer mer wolle unsern Monfred net so arg veletze,
sunst duht er uns uff`s Trockene setze,
Monfred, des konn jedem mol bassiern, des es koa Schond,
drum speele mer fer dich es Lied vumm Tiroler Lönd.

Bevor ich jetzt kumme dunn zum Schluß,
grieß ich die Leit bei dehne ich mich bedonke muß,
daß sie sich so hervorragend benumme,
um in unsern Kerwespruch zu kumme,
dene rot ich hier on dieser Stell;
seit wachsam unn seit hell,
duht ner noch so e paar Bolze robbe,
die dunn mer donn in` Spruch vum nächste Johr noistobbe,
mer wolle jo nächst Johr aa wirrer woas zu schwetze ho,
wonn`s haast "die Worfeller Kerb is do"

Zum Schluß richt ich moi Wort,
on die junge Borsch im Ort,
kummt zu unserm Haufe,
wonn ihr net Lust hobt nur zum Saufe,
wollt ihr aa Kerwetradition erhalte,
do kennt ihr eich bei uns entfalte,

daß net wirrer des bassiert,
woas mer im Kerwespruch bereits nodiert,
daß die Kerweborsch dunn sterwe,
drum dunn mer hier um Nachwuchs werwe,
losst eich net ziehe zu de Bundeswehr,
geht zur Kerwekompanie, des bringts viel mehr,
bei uns do gibt`s koa stromm steh` unn koa schieße,
mer losse uns doch die Jugend net vermiese,
drum kummt ehr Borsch unn duht eich melle,
zu de Kerweborsch vunn Worfelle.

Awwer oans des will ich eich glei soue,
unn wos ich sooch ess net geloue,
mer wolle koa Halbstarke unn koa Schläscher,
mer nemme Berschjer mit unn ohne Mädcher,
dene es Spass macht oan se`saufe,
unn net in de Wertschaft rum`seraufe,
mer nemme genauso gern aa Lumpe,
unn vunn mer aus aa paar Briepumpe,
die wern donn erstmol umerzooche,
unn zu Kerweborsch zurecht gebooche,
daß`se sperer wern zu richt`sche Männer,
unn net zu Pätscherstreter Penner,
daß`se e Mädche krije jung unn forsch,
wie sich`s gehert fer`n Kerweborsch,
drum seit ihr Mädcher aa net dumm,
guckt eich lieber noch de Kerweberschjer um,
die soin jung unn werklich knackisch,
unn aa sunst wo gonz schee zackisch,
macht`s wie die Mädcher in diesem Johr,
legt eich iwwer Kerb net uff`es Ohr,
unn seit mit Leib unn Seel` debei,
bei unsrer Kerwefeierei!

Zum Schluß ehr leiwe Leit, schnappt eich e Gläsje Woi,
unn stimmt jetzt mit uns oi,
singt mol mit unn werd` net mied,
bei unserm Worfeller Kerwelied!